


MANUEL MARIA: A VOZ NATURAL DUN "LABREGO CON ALGO DE POETA" (II)

Por Emilio José Ínsua

Continuamos o achegamento á poesía de Manuel María que iniciábamos no número anterior. Acrescentaremos nesta entrega novas mostras da fortísima implicación que todo o relacionado coa natureza posue na sua obra



Retrato de Manuel María feito por Xoán Carlos L. Blanco e incluído como ilustración na *Escola de poetas de Outeiro de Rei*. Edicións Xerais, Vigo, 1982.

Manuel María escolle como interlocutora para dicer o seu adeus, non por azar, á estación onde a natureza se amosa máis viva:

"É tempo xa de que me despida, Primavera.
Queda lonxe aquela edade na que
eran irmaus os nosos mencerex (...)
agromaban rosas, camelias, carabeles,
a vida tiña unha esencia musical
a cuio máxico son corrián os ríos,
danzaban, rumorosas, as florestas
e ordenaba o seu curso o universo.
De ti me despido pra sempre, Primavera.
Sei que o tempo é irreversible
e non vale de nada andar laiando.
Ameite fondamente e de verdade (...)"

Só che pido
unha raiola de sol e de alegria pra aquecer
a este meu triste corazón, vello e cansado."

A primavera de Venus (1993)

Manuel María botou man da natureza no poemario *Libro de pregos* (1962) para exprimir a sua dor con ocasión da desaparición física dun irmao seu. A morte, nestes versos, concibe-se, antes que nada, como un abandono do marco natural onde decorria a existéncia:

"Irmau: ¡deixache o po destes camiños
i o corazón prendido nas silveiras
escoando ledicias e orballos! (...)
¡Deixache o gando i os paxaros,
o marmurio calado do pai Miño,
a quietude infantil do noso pobo
i a gracia xentil das centeeiras!. (...)
¡Agora estás con Deus, sobor da terra,
e pódesselle pedir a Deus tódolos paxaros!".

Outras veces o ton tristeiro desta espécie de despedidas vitais de Manuel María aparece mitigado por alguma esperanza. A existéncia de dous seres humanos que se amaron prolongará-se tomando forma de bris e integrando-se harmonicamente na natureza:

(...) Envelleceremos xuntos
e, cando chegue a hora de partir,
o noso amor non morrerá:
hase transformar no bris lixeiro
que en maio canta emocionado
na escura folla das abelairas
ou no sol ourilocente do Outono
que bica ás carballeiras docemente".

Poemas da labarada estremecida (1981)


Nestas horas de reflexión e balanzo, de botar contas coa propia existencia, atopa o Manuel María nese amor da sua compañeira, Saleta, e no disfrute da natureza os seus saldos positivos más valiosos:

"Agora que entrei no propio Outono
camiñando amodo pró solpor (...)
Non teño tesouros e son dono
da estrela, do orballo, do albor,
do incansable regueiro cantador,
dos furacás, dos mares e dos tronos".

Nos Versos do lume e do vagalume (1982) o noso poeta deixa constancia explícita da sua vontade cando chegue a hora da derradeira viaxe, rexeitando a alternativa da incineración:

"Nom quero que o lume
destrua e aniquile
a minha carne
na que, ás veces,
cantou namorada
a cotovia.
Somente som terra.
Só desejo ser terra,
misturar-me coa terra,
perder-me, confundir-me
no silencio da terra.
E pido-lhe,
com todo o meu ser,
á terra minha mai,
que seja gentil comigo."

A natureza na literatura



Idéntico tema aborda no libro **Escolma de poetas de Outeiro de rei** (1982), concretamente no poema que leva por título "*Testamento*". Nel, Manuel María reitera o seu desexo de comuñón final coa terra:

"Enterrádeme en Outeiro
que quero escutar o Miño
co seu paso silandeiro
nos prados de Xuncaíño (...)
ollar como nace a herba
e oír ó cuco en abril (...)
contemprar a lúa noiva
e ollar espigar os trigos (...)".

Non directamente relacionados coa presenza intuída da morte ou co outono da vida, pero igualmente marcados pola tristura e o desamparo son aqueles versos do escritor chairego onde se fai patente a sua necesidade de sentir-se integrado na natureza e agarrado polos seus elementos. Un bo exemplo disto é o poema "*Desalento*", pertencente a **A luz ressuscitada**:

"Cando as árvores me negam a fala
e o río emudece ao meu passo,
e non me olham os penedos,
e nuves e estrelas están foscas,
e fogem os páxaros,
e non treme a terra, levemente
jubilosa, debaixo dos meus pés
sinto que todo o universo
perdeu o equilibrio e a harmonia (...)"

As tristezas interiores dominan en ocasións o corazón do poeta, até o punto de que este vira incapaz de perceber a beleza do mundo, de regalar-se coa fermosa visión da natureza adornada en cada sazón:

"Os meus usados olhos som incapazes
de contemplar os delicados
e esvaídos ouros do outono,
o verde nédio azul da primavera,
as luces excessivas do estio
e os enluitados grises do inverno.
Agora a minha olhada sempre está
aberta cara adentro (...)"

Versos do lume e do vagalume (1982)

Superando estes intres de relativo alleamento a respecto da natureza, Manuel María fai abondosas declaracions de integración nela e de comuñón cos seus elementos. Unha delas é esta:

(...) "Proclámome irmau dos castiñeiros,
das xestas, dos toxos, dos camelios,
das abidueiras, teixos e carballos
pois alumounos a mesma luz grisenta,
iguales choivas nos luiron
e un idéntico vento conferiuños
o outo don da vida e o da palabra".

Ritual pra unha tribu capital de concello (1986)

Moitos deses elementos naturais son vistos polo noso autor cun espírito diríamos franciscano, ao xeito de boa parte da producción poética de Noriega Varela. O noso Manuel María chega a definir-se, no libro **Documentos persoaes** (1958), como "unha humilde folla que salaia / na noite escura movida polo vento". A presenza no mundo e arredor de nós das más pequenas criaturas cobra un valor inmenso nos seus poemas. Dan fe disto versos como os pertencentes ao libro **Compendio de orballos e incertezas** (1991), concretamente á "*Baladía do regato do Cepelo*", poema onde Manuel María se identifica co pequeno río que atravesa o seu Outeiro de Rei natal:

"Sei que eu non son un río caudal
como o Pai Miño, senón breve,
humilde vea de auga
como o pobre regato do Cepelo
que vai entre carpazas, toxos,
freixos, abidueiras e ameneiros
dicendo a sua canción emocionada
por que sexa menor este silencio
que, como unha mesta tebra,
intenta envolver a todo o mundo (...)"

O prodígio da natureza, renovando-se cada primavera, dando froitos, rodeando imperceptiblemente e sen aspaventos notórios o noso viver é cantado polo Manuel María en versos como estes de **O libro das baladas** (1978):

A natureza na literatura

"A ras de chao, con pés ben chantados
no torrón, imos vivindo i ás veces
acontece que frolece unha mazaira,
que canta prodixiosamente unha laberca,
que unha nogueira dá noces,
que o bris menea ás abelairas,
que o vento pasa asubiando
i a formiga que puxa coa súa carga.
A ras de chao balan as ovellas, as
égoas rinchán chamando polos poltros,
as vacas pacen lentamente,
os cervos rebrincan polos boscos,
o aire é navegado polas pombas,
as xovencas reloucan polos prados,
chirlan agudamente as anduriñas (...)"

ou como estoutros da "Ode ao nacemento dunha folla", incluída no libro **As lúcidas lúas do outono** (1988):

"¿Qué cantidad de maravilla
foi precisa pra que
se produxera este prodixo?.
¿Qué dor ou que alegría
sentiu a arbre
cando esta folla
xurdíu á luz de súpeto?.
¿Qué lle diría o vento
cando a ollou?.
Cando se menea e vibra:
¿Qué sagredo ou mensaxe
nos quere transmitir?.
¿Cómo e de qué xeito
tivo que adelgazar a terra,
rubir arbre enriba, facerse
vidro musical e transparente
e ser delicada folla estremecida?"

No libro **A luz ressuscitada** hai poemas adicados ás más diversas criaturas, desde as más maxestuosas ás más pequenas, desde as más indómitas ás más cotiás: o cervo, a doniña, o boi, o can, o gato, o raposo, os peixes, a toupa, o vagalume, o lobo, a bolboreta, a rula, o rouxiñol, a gaivota, a laverca, a andoriña ("flor do ar"), o corvo, a lavandeira ("páxaro de pasos/ miúdos e nervosos, a correr,/ com medo apresurado, detrás do arado/ que abria a terra moura e tépeda/ pra sementar o centeio polo Outono") e, finalmente, as pombas:

"Irrenunciáveis pombas que voávades
no horto familiar da minha infáncia:
íades da figueira á maçaira;
do cedro, ao pexegueiro e ao loureiro,
ao mirto, á cerdeira ou á pereira.
Sulcávades o ar e, ao vosso passo,
deixávades um ronsel açucarado
de brancura inocente (...)

Este proceso de identificación do poeta con todos os elementos da natureza que o rodean chegará finalmente á sua quintaeséncia no poema titulado "*Home*":

"Os meus pés som carvalhos poderosos
enraizados no chao mui firmemente.
As maos convertem-se em pombas (...).
Mágico vale é o meu peito
cruzado de escusados, fondos rios (...).
O coração é um vulcán
aceso polo lume do amor.
Da fontela dos meus beiços
agromam palavras musicais
que surdem da terra como a água.
Os olhos como estrelas cintilando (...).
E a minha testa é alto monte
coroad de nuves e de neves
onde as calandras cantam livremente".

A luz ressuscitada

■ Debuxo de Felipe Senén, incluído como ilustración no libro de Manuel María *Poemas de labarada estremecida*, Edicións Xistral, Santiago 1980.

